

Bosna i Hercegovina
FEDERACIJA BOSNE I HERCEGOVINE
**AGENCIJA ZA NADZOR OSIGURANJA
FEDERACIJE BOSNE I HERCEGOVINE**
S A R A J E V O

Na osnovu člana 74. stav 1. alineja a., d. i e. a u vezi sa članom 76. stav 1. alineja a., b. i c., člana 128. stav 2. alineja g., člana 130. stav 1. alineja b. Zakona o osiguranju ("Službene novine Federacije Bosne i Hercegovine", broj 23/17), Stručni savjet Agencije za nadzor osiguranja Federacije Bosne i Hercegovine na 5. sjednici održanoj 22. 09. 2017. godine, d o n o s i

PRAVILNIK
O ELEMENTIMA I KONTROLI MARGINE SOLVENTNOSTI

I OPĆE ODREDBE

Član 1.

(Opće odredbe)

- (1) Ovim Pravilnikom uređuje se način i vrste pojedinih stavki koje se uzimaju u obzir pri izračunu adekvatnosti kapitala [obračun kapitala i garantnog fonda društva za osiguranje i reosiguranje (u daljem tekstu: društvo), obračun margine solventnosti za neživotna osiguranja, životna osiguranja i reosiguranje, način određivanja adekvatnosti kapitala društva], nelikvidna sredstva koja se uzimaju u obzir pri izračunu kapitala, sadržaj izvještaja o iznosu garantnog fonda, kapitala i margine solventnosti te rokovi i način izvještavanja Agencije za nadzor osiguranja Federacije Bosne i Hercegovine (u daljem tekstu: Agencija za nadzor).
- (2) Društvo je obavezno da pri izračunu obračunskih kategorija iz stava (1) ovog člana koristi podatke iz vlastitih poslovnih knjiga.

Član 2.

(Upravljanje rizicima)

- (1) Društvo za osiguranje je u cilju primjene pravila upravljanja rizicima obavezno da obračunava iznos kapitala i iskazuje adekvatnost kapitala na način propisan Zakonom o osiguranju (u daljem tekstu: Zakon) i ovim Pravilnikom.
- (2) U okviru politika i procedura za identifikovanje, mjerenje i praćenje rizika poslovanja društvo je obavezno da donese program za upravljanje kapitalom sa politikama vezanim za kvantitet i kvalitet kapitala kojeg je društvo obavezno da obezbjedi i održava, kao i da utvrdi procedure za kreiranje i razvoj metoda za praćenje tekućih i planiranje budućih potreba društva za kapitalom.
- (3) Uprava društva je odgovorna za održavanje propisanog iznosa kapitala i ispunjavanje zahtjeva za održavanje adekvatnosti kapitala u skladu sa Zakonom, ovim Pravilnikom, statutom i programom iz stava 2. ovog člana i drugim internim aktima društva.

II OBRAČUN KAPITALA I GARANTNOG FONDA DRUŠTVA

Član 3.

(Kapital društava za osiguranje)

- (1) Društvo je dužno raspolagati odgovarajućim kapitalom s obzirom na obim i vrste poslova osiguranja koje obavlja kao i rizike kojima je izloženo kod obavljanja ovih poslova.
- (2) Pri izračunu kapitala društva za osiguranje uzimaju se u obzir stavke osnovnog kapitala iz člana 68. Zakona i stavke dopunskog kapitala iz člana 69. ovog Zakona te stavke odbitka iz člana 70. ovog Zakona.

Član 4.

(Osnovni kapital)

- (1) Osnovni kapital društva na osnovu člana 68. stav (1) Zakona i ovog Pravilnika, sastoji se od:
 - a) uplaćenog dioničkog kapitala i uplaćene dioničke premije iz osnova nominalnog iznosa običnih dionica izdatih na osnovu novčanih uplata u dionički kapital društva,
 - b) rezervi (zakonskih i statutarne) koje ne proizlaze iz obaveza na osnovu ugovora o osiguranju i
 - c) akumulirane dobiti i dobiti poslije oporezivanja, iz posljednjeg obračunskog perioda za koji se raspoređuje dobit, a nakon donošenja odluke skupštine o raspodjeli dobiti.
- (2) Kod obračuna osnovnog kapitala iz stava 1. ovoga člana kao odbitne stavke na osnovu člana 68. stav (2) Zakona i ovog Pravilnika uzimaju se:
 - a) preneseni gubitak i gubitak tekuće godine,
 - b) otkupljene vlastite dionice,
 - c) nematerijalna imovina.

Član 5.

(Dopunski kapital)

- (1) Dopunski kapital društva na osnovu člana 69. stav (1) Zakona i ovog Pravilnika, sastoji se od:
 - a) dionički kapital uplaćen na osnovu prioriternih dionica,
 - b) podređeni dužnički finansijski instrumenti,
 - c) polovine upisanog neuplaćenog kapitala uz odobrenje Agencije za nadzor
 - d) druge stavke.
- (2) Podređeni dužnički finansijski instrumenti su vrijednosni papiri i drugi finansijski instrumenti na osnovu kojih imalac u slučaju stečaja, odnosno likvidacije izdavaoca ima pravo na isplatu nakon isplate drugih povjerioca, odnosno koji su, s obzirom na dospjeće i druge karakteristike, pogodni za pokrivanje eventualnih gubitaka zbog rizika kojima je tokom poslovanja izloženo društvo za osiguranje. Podređeni dužnički instrumenti sa fiksnim dospjećem ili prioriterni dionički kapital mogu iznositi najviše 25% u odnosu na osnovni kapital ili garantni fond zavisno od toga koji je iznos niži.
- (3) Druge stavke iz stava (1) tačka d) ovog člana su vrijednost matematičke rezerve koja u izračunu ne uzima u obzir stvarni trošak, odnosno dio stvarnog troška pribavljanja osiguranja umanjena za vrijednost matematičke rezerve koja u izračunu uzima u obzir stvarni trošak pribavljanja osiguranja. Stvarni troškovi pribavljanja osiguranja u izračunu matematičke rezerve ne smiju prelaziti 3,5% od osigurane svote. Negativne vrijednosti u izračunu matematičke rezerve se postavljaju na nulu.

Član 6.

(Garantni fond)

- (1) Garantni fond predstavljaju stavke osnovnog kapitala iz člana 68. Zakona odnosno člana 4. ovog Pravilnika i stavke dopunskog kapitala iz člana 69. Zakona odnosno člana 5. ovog Pravilnika.
- (2) Najmanje 50% garantnog fonda društva mora se sastojati od stavki osnovnog kapitala društva iz člana 68. Zakona odnosno člana 4. ovog Pravilnika.

Član 7.

(Stavke odbitka pri izračunu kapitala)

- (1) Pri izračunu kapitala društva, zbir osnovnog kapitala iz člana 4. ovog Pravilnika i dodatnog kapitala iz člana 5. stav (1) ovog Pravilnika u skladu sa članom 70. Zakona i ovog Pravilnika umanjuje se za sljedeće stavke:
 - a) učešće u kapitalu 20,00% i više udjela, dionica i drugih prava posredno i neposredno, drugih društava za osiguranje i reosiguranje, bankama i ostalim finansijskim institucijama u kojima se u skladu sa posebnim propisima izračunava adekvatnost kapitala,
 - b) ulaganja u podređene dužničke finansijske instrumente te druga ulaganja u lica iz tačke a) ovog stava koja se radi poštovanja adekvatnosti garantnog fonda tih lica, uzimaju u obzir pri izračunu njihovog garantnog fonda i u kojima je udio društva za osiguranje u skladu sa članom 31. stav (1) Zakona,
 - c) nelikvidna sredstva.
- (2) Nelikvidna sredstva u smislu ovog člana su sredstva koja nije moguće brzo unovčiti za izmirenje obaveza društva i to:
 - a) sva potraživanja za koja društvo nije izvršilo procjenu i ispravku vrijednosti u skladu sa podzakonskim aktima Agencije za nadzor,
 - b) udjeli u društva sa ograničenom odgovornošću u zemlji i inostranstvu, koja su u posljednoj poslovnoj godini ostvarila negativan finansijski rezultat;
 - c) dionice koje nisu uvrštene na organizovano tržište,
 - d) potraživanja po osnovu uplata u druge svrhe koja su namenjena uzajamnim garancijama za ispunjavanje obaveza više lica (potraživanja od Biroa ZK, i dr.),
 - e) imovina društva na kojoj je zasnovano hipotekarno i založno pravo.

III OBRAČUN MARGINE SOLVENTNOSTI

Član 8.

(Margina solventnosti)

Marginu solventnosti društva su dužna obračunavati odvojeno za poslove neživotnih, poslove životnih osiguranja i poslove reosiguranja.

Član 9.

(Margina solventnosti društava za osiguranje koje obavlja poslove životnih osiguranja)

- (1) Margina solventnosti društava za osiguranje koja obavljaju poslove životnog i rentnog osiguranja izračunava se kao zbir prvog i drugog rezultata.
- (2) Prvi rezultat izračunava se na sljedeći način:
 - a) suma matematičkih rezervi formiranih na posljednji dan prethodne poslovne godine, uključujući i matematičku rezervu formiranu za osiguranja koja pokriva reosiguranje množi se sa 0,04, a dobiveni iznos dalje se množi sa omjerom koji za posljednju poslovnu godinu odgovara odnosu između:
 - 1) ukupnog iznosa matematičkih rezervi formiranih na posljednji dan prethodne poslovne godine umanjeno za udjel matematičke rezerve koja pokriva reosiguranje (matematička rezerva neto od reosiguranja) i
 - 2) ukupnog iznosa matematičkih rezervi formiranih na posljednji dan prethodne poslovne godine uključujući matematičke rezerve za osiguranje koje pokriva reosiguranje (bruto matematičke rezerve). Ukoliko je iznos koeficijenta niži od 0,85 onda se pri izračunu uzima koeficijent 0,85;
 - b) drugi rezultat se izračunava samo za osiguranje kod kojih rizični kapital nije negativan i izračunava se na sljedeći način:

- 1) iznos rizičnog kapitala (gdje je rizični kapital razlika između osigurane svote u slučaju smrti i izračunate matematičke rezerve) na posljednji dan prethodne godine, uključujući rizični kapital koji pokriva reosiguranje (bruto rizični kapital) množi se sa omjerom koji za posljednju poslovnu godinu odgovara odnosu između:
 - ukupnog iznosa rizičnog kapitala na posljednji dan prethodne poslovne godine, umanjenog za iznos rizičnog kapitala koji pokriva reosiguranje (neto rizični kapital) i
 - ukupnog iznosa rizičnog kapitala na posljednji dan prethodne poslovne godine, uključujući rizični kapital koji pokriva reosiguranje. Ukoliko je iznos koeficijenta niži od 0,50 onda se pri izračunu uzima koeficijent 0,50,
 - 2) tako dobiven rezultat množi se sa:
 - koeficijentom 0,001 za ugovore za slučaj smrti koji su sklopljeni najviše na tri godine,
 - sa koeficijentom 0,0015 za ugovore za slučaj smrti koji su sklopljeni na više od tri, a manje od pet godina,
 - sa koeficijentom 0,003 za ostale ugovore za slučaj smrti.
- (3) Margina solventnosti društva za osiguranje koje obavlja poslove životnog osiguranja povezanog sa investicijskim fondovima izračunava se na sljedeći način:
- a) za društvo koje snosi rizik ulaganja 4% matematičke rezerve množi se sa koeficijentom koji se dobije kao količnik matematičke rezerve neto od reosiguranja i ukupne matematičke rezerve i to na posljednji dan prethodne poslovne godine. Ako je dobiveni koeficijent manji od 0,85 onda se množi sa koeficijentom 0,85,
 - b) za društvo koje ne snosi rizik ulaganja, a troškovi upravljanja su određeni i nepromjenljivi za period duži od pet godina 1% matematičke rezerve množi se sa koeficijentom koji se dobije kao količnik matematičke rezerve neto od reosiguranja i ukupne matematičke rezerve i to na posljednji dan prethodne poslovne godine. Ako je dobiveni koeficijent manji od 0,85 onda se množi sa koeficijentom 0,85,
 - c) za društvo koje ne snosi rizik ulaganja, a troškovi upravljanja nisu određeni i nepromjenljivi 25% neto administrativnih troškova posljednjeg dana prethodne poslovne godine povezanih sa tim troškovima,
 - d) za društvo koje snosi rizik smrti osiguranika 0,3% ukupnog rizičnog kapitala množi se sa koeficijentom dobivenim iz količnika rizičnog kapitala neto od reosiguranja posljednjeg dana prethodne poslovne godine i ukupnog rizičnog kapitala posljednjeg dana prethodne poslovne godine. Ako je tako dobiveni koeficijent manji od 0,50 onda se množi sa koeficijentom 0,50.
- (4) Za dopunska osiguranja propisana članom 12. stav (3) Zakona margina solventnosti izračunava se u skladu sa odredbama člana 72. Zakona odnosno člana 10. ovog Pravilnika.

Član 10.

(Margina solventnosti društava za osiguranje koje obavlja poslove neživotnih osiguranja i društava za reosiguranje)

- (1) Margina solventnosti društva koje obavlja poslove neživotnih osiguranja i poslove reosiguranja obračunava se na osnovu odnosa premija, odnosno šteta i to onoj koja je viša.
- (2) Margina solventnosti na osnovu premija izračunava se na sljedeći način:
 - a) na ukupan zbir premija ili doprinosa od djelatnosti neposrednog posla osiguranja, uključujući i sve dodatne iznose uz premije ili doprinose za posljednju poslovnu godinu dodaju se iznosi premija primljenih u reosiguranje tokom posljednje poslovne godine i umanjuje se za ukupan iznos premija ili doprinosa uzajamnog osiguranja otkazanih i otpisanih tokom posljednje poslovne godine. Dobiveni iznos podijeli se na dva dijela. Prvi dio tog iznosa do 100.000.000,00 KM množi se sa koeficijentom 0,18 a drugi dio, odnosno preostali iznos množi sa 0,16. Tako dobiveni umnošci se saberu;

- b) zbir proizvoda iz tačke a) množi se koeficijentom koji se dobije iz odnosa iznosa mjerodavnih šteta (iznos isplaćenih šteta uvećan za iznos ukupno rezervisanih šteta na kraju perioda i umanjen za iznos ukupno rezervisanih šteta na početku perioda) umanjenih za dio koji pokriva reosiguranje, naplaćene regrese i bruto iznosa mjerodavnih šteta za posljednju poslovnu godinu. Ukoliko je koeficijent niži od 0,50 onda se pri izračunu uzima koeficijent 0,50.
- (3) Margina solventnosti na osnovu šteta izračunava se na sljedeći način:
- a) na ukupan iznos isplaćenih šteta u neposrednom poslu osiguranja za tri posljednje poslovne godine ili posljednjih sedam godina u slučaju društva koje isključivo, odnosno u većem dijelu ugovara osiguranja koja pokrivaju rizik kredita, nepogode, tuče ili mraza bez odbitka šteta koje nose reosiguravači ili retrocesionari se dodaju:
- 1) sve isplate odšteta za obaveze preuzete u reosiguranju i retrocesiju tokom istog perioda i
 - 2) iznos rezervacija za štete utvrđen na kraju posljednje poslovne godine i to za neposredni posao osiguranja i za obaveze preuzete u reosiguranju;
- b) od dobivenog iznosa u tački a) oduzimaju se:
- 1) primici ostvareni na osnovu regresa tokom tri, odnosno sedam poslovnih godina i
 - 2) iznosi rezervacija za štete na početku prve od tri, odnosno sedam poslovnih godina i to za neposredan posao osiguranja i za obaveze preuzete u reosiguranju;
- c) jedna trećina, odnosno jedna sedmina ovako dobivenog iznosa - zavisno od vremena uzimanja podataka - dijeli se na dva dijela. Prvi dio tog iznosa do 70.000.000,00 KM množi se sa koeficijentom 0,26, a drugi dio, odnosno preostali iznos množi sa koeficijentom 0,23. Ovako dobiveni umnošci se saberu. Dobiveni rezultat množi se koeficijentom koji se dobije iz odnosa iznosa mjerodavnih šteta umanjenih za dio koji pokriva reosiguranje i bruto iznosa mjerodavnih šteta za posljednju poslovnu godinu. Ukoliko je koeficijent niži od 0,50 onda se pri izračunu uzima koeficijent 0,50.
- (4) Margina solventnosti za društva koja obavljaju poslove zdravstvenog osiguranja za koja su tehničke osnove osiguranja slične tehničkim osnovama životnih osiguranja, jednaka je jednoj trećini margine solventnosti iz stava (1) ovog člana, ako su ispunjeni sljedeći uvjeti:
- a) premije su obračunate aktuarskim metodama na osnovu tablica,
 - b) društvo u vezi sa tim osiguranjima oblikuje posebne rezerve za starost,
 - c) premije obuhvaćaju dodatak za sigurnost na premiju,
 - d) društvo može otkazati ugovor o osiguranju najkasnije prije isteka treće godine osiguranja i
 - e) ugovorom o osiguranju predviđena je mogućnost povećanja premije, odnosno smanjenje obaveza društva.
- (5) Izuzetno od odredbe stava (1) ovog člana, margina solventnosti za prvu godinu poslovanja društva za osiguranje izračunava se u skladu sa stavom (2) ovog člana.
- (6) U slučaju kada je izračunata margina solventnosti za osiguranje tekuće godine manja od izračunate margine solventnosti društva za osiguranje prethodne godine, margina solventnosti mora biti najmanje jednaka margini solventnosti prethodne godine pomnoženoj sa omjerom između rezervi šteta na kraju tekuće godine umanjenih za udio reosiguranja i rezervi šteta na kraju prethodne godine umanjenih za udio reosiguranja s tim da omjer ne smije biti veći od 1.

IV ADEKVATNOST KAPITALA

Član 11.

(Uslovi adekvatnosti kapitala)

- (1) Kapital društva za osiguranje iz člana 70. Zakona odnosno člana 7. ovog Pravilnika koje obavlja poslove osiguranja u grupi životnih osiguranja mora biti najmanje jednak:
 - a) margini solventnosti koja se izračunava na način određen članom 71. st. od (2) do (5) Zakona, odnosno člana 9. ovog Pravilnika,
 - b) minimalnog iznosa garantnog fonda propisanog odredbama člana 73. stav 3. Zakona.
- (2) Kapital društva za osiguranje iz člana 70. Zakona odnosno člana 7. ovog Pravilnika koje obavlja poslove osiguranja u grupi neživotnih osiguranja i kapital društva za reosiguranje mora biti najmanje jednak:
 - a) margini solventnosti izračunatoj na osnovu odnosa premija, odnosno šteta i to onoj koja je viša;
 - b) minimalnog iznosa garantnog fonda iz člana 73. stav 3. Zakona.
- (3) Garantni fond društva za osiguranje i reosiguranje definisan u članu 73. stav 1. Zakona i člana 6. ovoga Pravilnika u skladu sa članom 73. stav 4. Zakona i ovog Pravilnika ne može biti manji od:
 - a) 1/3 margine solventnosti;
 - b) minimalnog iznosa garantnog fonda propisanog odredbama člana 73. stav 3. Zakona.

Član 12.

(Mjere uprave radi osiguravanja adekvatnosti kapitala)

- (1) Kada je kapital društva niži od garantnog fonda (1/3 margine solventnosti) ili od minimalnog iznosa garantnog fonda propisanog odredbama člana 73. Zakona, društvo je obavezno Agenciji za nadzor podnijeti na saglasnost plan za finansijski oporavak i plan kratkoročnog finansijskog programa kojim će se ukloniti nedostatak. U planu oporavka i kratkoročnom finansijskom programu obavezno se navode rokovi za njihovo provođenje i nosioci koji ne mogu biti duži od 60 dana i koji treba da sadrži detaljan opis svih činjenica koji su uzrokovali stanje neadekvatnosti kapitala, detaljan opis svih činjenica koje društvo planira da poduzme kako bi dovelo društvo u položaj ispunjenih uslova adekvatnosti kapitala.
- (2) Kada je visina kapitala društva viša od minimalnog iznosa garantnog fonda propisanog odredbama člana 73. Zakona, a nalazi se u zoni između visine 1/3 margine solventnosti (garantni fond) i margine solventnosti, društvo je dužno Agenciji za nadzor dostaviti srednjoročni plan za dostizanje margine solventnosti. Srednjoročni plan iz ovog stava sačinjava se za period do tri godine sa utvrđenom godišnjom dinamikom i nosiocima.

V OBLIK I SADRŽAJ IZVJEŠTAJA

Član 13.

(Datum obračuna margine solventnosti, garantnog fonda i kapitala)

Društvo je dužno vršiti obračun, odnosno utvrđivati marginu solventnosti, garantni fond i kapital posljednjeg dana tekućeg obračunskog perioda i to na:

- a) 31. 12. tekuće godine, godišnji obračun,
- b) 30. 06. polugodišnji obračun,
- c) 31. 03. i 30. 09. tromjesečni obračun,
- d) dan prenosa portfelja.

Član 14.

(Izvještaji)

- (1) Društvo obračun kapitala i garantnog fonda, u vezi s članom 13. ovoga Pravilnika, iskazuje na «Obrascu K-K-F».
- (2) Obračun margine solventnosti u vezi s članom 10. ovoga Pravilnika društvo iskazuje na:
 - a) «Obrascu MS1-K-F» za poslove neživotnih osiguranja;
 - b) «Obrascu MS2-K-F» za poslove životnih osiguranja;
 - c) «Obrascu MS3-K-F» za poslove reosiguranja.
- (3) Pisani obrasci iz stava 1 i 2 ovog člana sastavni su dio ovog Pravilnika, a obrasci za dostavu u elektronskoj formi su u formatu xls i preuzimaju se sa web stranice Agencije za nadzor: www.nados.ba.
- (4) U obrascima iz stava 1 i 2 ovog člana iznosi se iskazuju u konvertibilnim markama sa dva decimalna mjesta.

Član 15.

(Rokovi za dostavu izvještaja)

- (1) Društvo je dužno obrasce iz člana 14. ovog Pravilnika dostaviti Agenciji za nadzor u pisanoj i elektronskoj formi u sljedećim rokovima:
 - a) za prvo tromjeseče do 30. 04. tekuće poslovne godine;
 - b) za drugo tromjeseče do 31. 07. tekuće poslovne godine;
 - c) za treće tromjeseče do 31. 10. tekuće poslovne godine i
 - d) za četvrto tromjeseče u roku od tri mjeseca po isteku tekuće poslovne godine odnosno do 31. 03. naredne godine.
- (2) Obrasci iz stava 1. ovoga člana moraju biti ovjereni od direktora i imenovanog ovlaštenog aktuara društva.

VI PRELAZNE I ZAVRŠNE ODREDBE

Član 16.

(Usklađivanje poslovanja društava za osiguranje, odnosno društva za reosiguranje)

- (1) Društva za osiguranje, odnosno društva za reosiguranje dužna su u roku pet godina od dana stupanja na snagu Zakona uskladiti svoje poslovanje sa odredbama člana 25. stav (1) i člana 73. stav (3) Zakona.
- (2) U periodu od stupanja na snagu Zakona do usklađivanja u skladu sa stavom (1) ovog člana društva su dužna održavati minimalni dionički kapital, kako sljedei:
 - a) 2.000.000,00 KM ako društvo posluje sa jednom ili više vrsta osiguranja u skladu sa članom 9. stav (2) tač. od j) do o) Zakona,
 - b) 2.000.000,00 KM ako društvo posluje sa jednom ili više vrsta osiguranja u skladu sa članom 9. stav (2) tač. od a) do h) i tač. p) i s) Zakona,
 - c) 1.000.000,00 KM ako društvo posluje sa jednom ili više vrsta osiguranja u skladu sa članom 9. stav (2) tač. i) i/ili r) Zakona,
 - d) 3.000.000,00 KM ako društvo posluje sa životnim osiguranjem,
 - e) 3.000.000,00 KM ako društvo obavlja poslove reosiguranja.
- (3) Pored odredbi u stavu (2) ovog člana u periodu od stupanja na snagu Zakona do usklađivanja u skladu sa stavom (1) ovog člana, društva su dužna održavati adekvatnost kapitala iz člana 11. ovog Pravilnika.

Član 17.

(Finansijski planovi za usklađivanje poslovanja društava za osiguranje, odnosno društva za reosiguranje)

- (1) Društva za osiguranje, odnosno društva za reosiguranje dužna su u roku 90 dana od dana stupanja na snagu ovog Pravilnika dostaviti Agenciji za nadzor plan za usklađivanje

poslovanja sa odredbama člana 25. stav (1) i člana 73. stav (3) Zakona u roku propisanim članom 225. Zakona i člana 16. ovog Pravilnika.

- (2) Izvještaj o provođenju mjera navedenim u planu iz prethodnog stava Društva za osiguranje su obavezna podnositi Agenciji za nadzor godišnje uz izvještaje propisane članom 14. stav (1) ovog Pravilnika u roku propisanim članom 15. stav (1) tačka d. ovog Pravilnika.

Član 18.

(Prestanak važenja propisa)

Stupanjem na snagu ovog Pravilnika prestaju da vrijede odredbe Pravilnika o elementima i kontroli margine solventnosti („Službene novine Federacije Bosne i Hercegovine“ broj: 3/13 i 50/13).

Član 19.

(Stupanje na snagu propisa)

Ovaj Pravilnik stupa na snagu osmog dana od dana objavljivanja u „Službenim novinama Federacije Bosne i Hercegovine“.

PREDSJEDNIK
STRUČNOG SAVJETA

mr.sci. Edita Kalajdžić s.r.

Broj: 021-2589-4/17
Sarajevo, 22. 09. 2017. godine